

Collavino riceve la laurea *honoris causa*

Little Italy... ma Grant Friûl

*Lauree honoris causa a Mario Collavino
di Muris di Ruvign*

1776 pits de Freedom Tower (la Tor de Libertât), 1776 l'an de Independence dai Stâts Unîts e 1077 l'an di fondazion de Patrie dal Friûl. Ce leam àno chescj trê numars? Un leam fuart tant che il ciment armât che il siôr Mario Collavino e i siei colaboradôrs a àn impastât par tirâ sù la gnove tor simbul dai Stâts Unîts braurôs de lôr fuarce economiche, politiche e culturâl sul terrorisim e su la asse.

Mario Collavino, furlan di Muris di Ruvigne emigrât in Canadâ tai agns '50, si pues ben defini "il furlan fûr dal Friûl plui nomenât – e a buine reson – dal 2011", ancje se Oscar Puntel al veve za intervistât Mario su "La Patrie dal Friul" tal Avost dal 2009. E, a distance di doi agns juscj di chê interviste, Collavino chest an al à donât ae sò comunitât une grande statue dedicate al emigrant che e je stade poiade su la mont di Ruvigne. Al è stât protagonist de *convention* dal Ente Friuli nel Mondo a Spilimberc; in Otubar, la Famee Furlane di New York i à dedicate une serade di onôr e di ricognossince li che al à partecipât ancje il President de nestre Region Renzo Tondo. E, simpri il mès passât, la Universitât dal Friûl e à dât a Mario la laurea *honoris causa* par «i nivei di ecelence li che al è rivât tal cjamp de ingegnarie civil». Sincere in maniere esemplâr e je stade la *lectio magistralis* dal "laureant inzegnâr" Collavino che al à viert il so discors cussì: «*Bundi a duçj e grazie di vè volût partecipâ a cheste prestigjose cerimonie e di onorâmi cu la vuestre presince. A mi plasarès fevelâus par furlan – e cheste istituzion universitarie mi permetarès ancje di fâlu – ma par respîet di chei che no lu cognossin o continuerai par italian*». Une storie contemporanie di sacrifici, intuizion,

Setemane furlane a Milan

Dai 12 ai 19 di Novembar i furlans sot de "Madonûte" si incuintrîn ae "Setemane de culture furlane", rivade ae so XXVI edizion e organizade come ogni an dal Fogolâr Furlan di Milan. Sabide l'event principâl cu la premiazion dal «Furlan de diaspora», che l'an passât al à premiât il cardiache Pietro Andreuzzi. Vôs a disîn che il vincidôr dal 2011 al sarà un artist... No podaran po dopo mancjà i *rendez-vous* enogastronomiche, ancje pai plui zovins, cuntun «Happy hour furlan». Par informazions: www.fogolarimilano.it

lavôr, coraç e cumò di meretade visibilitât pal om di Muris che cui siei fradis e cui siei fis al à mostrade la grandece dal Friûl laboriôs – cheste volte sì, cence retoriche –. E cumò, in ocasion de scree oficial de tor, sperin di viodi in bande de bandiere americane chê vivarose dal Friûl ancje parcè che Mario al à prometût te *lectio* ce che nus veve za dit te interviste dal 2009, ven a stâi che su la tor plui alte di

New York e di dute la Americhe si viodarà la bandiere dal Friûl. E sarès une grande ocasion di visibilitât pes dôs acuilis leadis di chel '77, date inziâl di une grande storie, e di tantis similitudins, a partî de misturance di popui e di lenghis che a àn costituît e alimentât i doi popui.

Dôs bandieris par diferenziâsi di chê che no je une misturance ma un sbrudiot, chê "Little Italy" simbul stereotipât di une Italie fate di "mafia, pizza e mandolino". Sperin che la inaugurazion de Freedom Tower e deventi une ocasion furlane, un ocasion par mostrâ al Mont ce che o sin, ce che o volin e ce che o sin bogns di fâ.